

# Tiwei Pol Kewisik Ken Mit Ne Wit Efasas

## Menmen me tiwei ik

Pol katip mit ne Efasas him gude 1:1-2

Him me Kraiss ketike mit nirak ne sios 1:3-3:21

Menmen mit ne weiwik me God hir nanisesim 4:1-6:20

Pol katip mit ne Efasas him mikaru 6:21-24

---

**1** <sup>1</sup>Hi Pol nipaa God hanhana hirak kehimitena hi aposel ke Kraiss Jisas hi hatip mit him mirak. Hi hewis tiwei ik ken yi mit miyapir ne God yi yau yeit wit Efasas, yi yises him me Kraiss Jisas. <sup>2</sup>Hi hanhan God hirak Haai kiau, hirak ketike Mitik Iuwe Jisas Kraiss hirakit tatrekyi yaaim, yi eiyu werek werek.

## God hirak kewetai menmen yaaim mentar Kraiss Jisas

<sup>3</sup>Haiu emwenipi niuk me God hirak Haai ke Mitik Iuwe kiau Jisas Kraiss. Hirak kerekyei yaaim kentar haiu mit ne Kraiss, te God hirak kewetai menmen mirak yapirwe me wit kirak. <sup>4</sup>Nipaa hirak ap kewis ti ketike nepni wen au, hirak kehimitenai haiu mit nirak mentar haiu ne Kraiss, te God hirak kerekyei haiu emu han yaaik prar prar, te menmen enum mau han kiau au. <sup>5</sup>God nipaa hanhan haiu mit te hirak han kitet kakrekyei haiu nikerek nirak mentar Jisas Kraiss. <sup>6</sup>Te haiu emwenipi niuk mirak mamantar hirak kerekyei haiu yaain iuwe keriuwe Himin Yaaik ke Kraiss kerek God hanhanek.

<sup>7</sup>Kraiss nipaa kaa, hemkre mirak mewen, te hirak kaktaihis me menmen enum God kakriak mit em. Hirak kesak menmen enum haiu miriakem. Kraiss hirak kerekyeyem kentar hirak hanhan haiu mit wisenum. <sup>8-9</sup>God kertei menmen wisenum te hirak kises menmen nipaa

---

<sup>a</sup> 1:1 Ro 1:1, 7; 1Ko 1:1; Kl 1:1; Ap 18:19-21; 19:1    <sup>b</sup> 1:2 2Ko 1:2; Kl 1:2    <sup>c</sup> 1:3 Ef 2:6

<sup>d</sup> 1:4 Jo 15:16, 17:24; 2Te 2:13; Ef 5:27; Kl 1:22    <sup>e</sup> 1:5 Jo 1:12    <sup>f</sup> 1:6 Mt 3:17; Kl 1:13

<sup>g</sup> 1:7 Ef 2:7; Kl 1:14, 20    <sup>h</sup> 1:9 Ro 16:25

hirak han kitet hirak kakriakem, te hirak kewepaiyapir menmen hirak hanhan kaknipem kakriuwe Krai. <sup>10</sup>iMenmen God han kitetim hiram mar im: Maain wi hirak han kitet hiram yaaim hirak kakri menmen yapirwe me ti metike menmen me wit kirak hiram mamnen mamit niutip, te Krai kakinin kaku naanmampre menmen yapirwe.

<sup>11</sup>jMenmen yapirwe mamnen mamir ke God han kitet hiram mamnen. God kehimitenai haiu mit nirak meriuwe Krai mentar menmen hirak nipaa enum eik hirak han kitet kakriakem. <sup>12</sup>God kiriak menmen im te haiu mit kerek minin mises him me Krai, haiu emwenipi niuk mirak iuwe. <sup>13</sup>kYi yire haiu mit me wi nipaa yi yemtau him me God pike kaktihis, yi yises him me Krai. Yi yisesik epei au, God kehimiteni yi nirak yeriuwe God Himin Yaaik. Hirak keriuwetek kan kau kekre yi mit kar ke nipaa hirak katip hirak kaksiuwerek. <sup>14</sup>lGod keteiknai maain haiu mamit menmen mirak yaaim hirak ketpim me mit hir nisesik. Hirak keteiknaiyem keriuwe Himin Yaaik kirak kerek hirak kewetaiyek. Menmen im meteiknai God kaktaihis haiu mamu mamtikerek. God kakit niuk iuwe kakintar menmen im hirak nepei kiriakem.

#### **Pol kitehi God kakikaap mit ne Efesas hir nanirtei menmen werek werek**

<sup>15</sup>mHi kerekek hentar hi hemtau yi yises him me Mitik Iuwe Jisas, yi han tewenin mit miyapir yapirwe ne God, <sup>16</sup>nhekrit hekrit hi hatip God hirak yaaik kentar yi mit miyapir. Hi han kitet yi mit, <sup>17</sup>ote hi hitehi God hirak God ke Mitik Iuwe kiau Jisas Krai, hirak Haai kiau, haiu mewenipi niuk mirak, hi hitiwekhi hirak kakikepi yi han kitet menmen mirak werek werek, te yi eiyirtei him mirak werek werek, te yi eiyirtei God hirekes werek werek. <sup>18</sup>pHi hanhan hirak God kakikepi, te yi eiyirtei eiyikre han ki hiram mekam menmen hirak kenini yi yaitiwem, yi eiyirtei menmen kerek nipaa hirak katip kakwetaiyem, hiram menmen yaaim iuwe. <sup>19</sup>qHi hanhan hirak kakteikni yi eiyirtei menmen mirak iuwe mamkaap haiu mit haiu kerek mises him mirak. Menmen mirak hiram iuwe, te haiu ap maminkerem au. Menmen im maamkaap haiu mit mamir ke <sup>20</sup>rhiram mikaap Krai wi nipaa hirak kaa, te God kikiak kekrit keriuwerem, hirak kewisik kau ketikerek keit wit kirak naanmipre menmen. <sup>21</sup>sIn ek Krai kau en kinin menmen yapirwe meit wit ke God, o ti ik e. Hirak kinin tipir, herwe, gavman, menmen yapirwe mepu in metike menmen meiyam maain mamkaru mamnen. <sup>22</sup>tGod epei kewis menmen yapirwe mamises him me Krai, hirak God kehimitanek hirak

---

<sup>i</sup> 1:10 Ga 4:4; Kl 1:16, 20    <sup>j</sup> 1:11 Ro 8:28-29    <sup>k</sup> 1:13 Kl 1:4-6; Ef 4:30    <sup>l</sup> 1:14 2Ko 1:22  
<sup>m</sup> 1:15 Kl 1:4    <sup>n</sup> 1:16 Kl 1:3; 1Te 1:2    <sup>o</sup> 1:17 Kl 1:9    <sup>p</sup> 1:18 Ef 4:4; Kl 1:12    <sup>q</sup> 1:19 Kl 1:11  
<sup>r</sup> 1:20 2Ko 13:4; Kl 2:12; Hi 1:3    <sup>s</sup> 1:21 Kl 1:16, 2:10    <sup>t</sup> 1:22 Sam 8:6; Mt 28:18; Ef 4:15

kinin naanmipre menmen yapirwe me mit ne weiwik mirak. Hirak kire paan, <sup>23</sup> haiu mit miyapir ne weiwik me God haiu mire yink kirak, haiu mekepek hirak kepu kire Mitik Iuwe, hirak hirekes kau kerer menmen yapirwe.

**God kenip haiu mit kerek nipaa haiu mire mit  
naa in ek haiu mepu metike Kraiss**

**2** <sup>1</sup> Nipaa yi mit miyapir yi yire mit epei naa yentar yi yeweikin sip yewet God, yi yiriak enum. <sup>2</sup> Me wi eim yi yises menmen enum me ti. Nipaa yi yises menmen enum me mitik iuwe Seten kerek kinin naanmipre tipir, teket maam, herwe, menmen enum. In ek, hirak kinin naanmipre mit kari han ke mit kerek nipaa hir neweikin sip newet God. <sup>3</sup> Nipaa haiu mit haiu mar ke mit enun en. Haiu mises menmen haiu hanhanem. Haiu miriak menmen enum han kiau hanhan haiu miriakem, te maain God kakrekyei enum kakraiwaank kakir ke mit han en.

<sup>4-5</sup> Menmen enum nipaa haiu miriakem hiram meraiwaank te haiu mami. Te God hirak han teweninai wisenum keriuwe menmen mirak, te hirak kenipai haiu mamu mamtike Kraiss. God pike ketihis kentar hirak hanhani. <sup>6</sup> Hirak God kekekyei haiu mit metike Kraiss, haiu mepu en metikerek, haiu maminin naanmamre menmen. <sup>7</sup> God kiriak menmen im kentar wi im ere maain hirak kakteikin menmen yapirwe han kewim markeim hirak han tewenin haiu mit keriuwe menmen Jisas Kraiss kerekyeyem. <sup>8</sup> Yi epei yises him me Kraiss, te God hanhani hirak kaktihis. Yi ap yikaap hiras au. God kerekek kerekyiyem weinim. <sup>9</sup> Yi ap yiriak menmen yaaim, te God ketihis au, te mitik kiutip ap kakwenipi hirekes kaktip hirak iuwe taau! God kerekek! <sup>10</sup> God kenipai (o kerekyei) haiu mit haiu mire mit nirak mentar haiu mises him me Kraiss Jisas. Nipaa God kehimitan menmen yaaim, te hirak kenipai haiu emisesim mamriak menmen yaaim keremem.

**Kraiss kari weiwik wik men mire mitutip**

<sup>11</sup> Yi han ekitet nipaa ein mit ne Isrel nerekir yink kir neteikin mit hir nises God. Hir newis niuk mi yi mit enun ap yerekir yink ki te yi ap yises God au. Nipaa yi yire mit ne weiwik ham. <sup>12</sup> Nipaa yi yetari Kraiss, yi ap ne weiwik me mit ne Isrel au. Nipaa God kewet mit han him mirak hir netikerek nekiyan nau neit, te yi au. Yi ap yau ti ik yemerir menmen yaaim mamnen au. Te God ap kaku kaktikewi taau!

---

<sup>u</sup> 1:23 Ro 12:5; Kl 1:18; Ef 4:10    <sup>v</sup> 2:1 Kl 1:21, 2:13    <sup>w</sup> 2:2 Kl 3:7; Ta 3:3; Jo 12:31; Ef 5:6, 6:12    <sup>x</sup> 2:3 Kl 3:6    <sup>y</sup> 2:4 Lu 15:24, 32; Ro 6:13; Ef 2:1; Ap 15:11    <sup>z</sup> 2:6 Kl 2:12    <sup>a</sup> 2:7 Ef 1:7    <sup>b</sup> 2:8 Jo 4:10; Hi 6:4    <sup>c</sup> 2:9 1Ko 1:29-31; 2Ti 1:9    <sup>d</sup> 2:10 Ta 2:14    <sup>e</sup> 2:11 Ef 5:8  
<sup>f</sup> 2:12 Kl 1:21; Ro 9:4; 1Te 4:13

<sup>13g</sup>Te in ek yi kerek nipaa yi yetari menmen im hi epei hetpiyem, yi yire mit hir nepeit yanimin. In ek Kraais keriuwe hemkre mirak mewen hirak kaa, hirak keithis yi mit miyapir, te in ek yi nepei yises him me God. <sup>14h</sup>Kraais hirekes kerekyei haiu mit miyapir mekiyan mau meit. Nipaa mit ne weiwik me Isrel hir enun nepan neriuwe mit ne weiwik ham nerer wit wit. Te in ek Kraais kaa keriuwe yink kirak, hirak kenipai mit miyapir merer wit wit haiu mau niutip. Hirak keremir menmen miwaai nimin me haiu mit kerek nipaa menipai haiu wik mar ke mitik kewen niwa keit ni. Hirak kenipek kire ni miutip. <sup>15i</sup>Nipaa Kraais hirak kaa kenip him Moses kewisim mau tiwei kerek mit ne Isrel nisesim, hiram menmen weinim, te hirak kaknip mit ne weiwik wik hir nanre yink kiutip hir nekiyan nau neit. <sup>16j</sup>Kraais kaa kentar nu tentarakit, te hirak keremir menmen menipai haiu mire wik hiram maa. Hirak keriyei haiu mire mit miyapir ne weiwik niutip, haiu mekiyan mau meit mises God. <sup>17k</sup>Kraais hirak kan ti kewepyapir him yaaim katip haiu mit mamtike God mamkiyan mamu mamit. Him im epei man yi mit yi yire mit hir nerp yanimin, yi ap yises God au. Him im yi yetike mit hir nises God hir nire mit nau menep netike God. <sup>18l</sup>Haiu weiwik wik haiu meriuwe God Himin Yaaik haiu niutip hirak keriyei haiu men God Haai mentar menmen Kraais kerekyeyem.

### Haiu mit mises God haiu mire winak kirak

<sup>19m</sup>Te in ek yi ap yire mit hir ap wit mei mir au. Yi yire weiwik miutip yetike mit miyapir nises God. Yi nikerek ne God. <sup>20n</sup>Yi yire winak God kimaak. Haiu mit aposel metike mit profet kerek mewepyapir him kerek God ketpaiyem, haiu mire teinik kerek mit nekin hei em me winak. Jisas Kraais hirekes kire teinik mitik iuwe kerp nimin kinan winak siup. <sup>21o</sup>Hirak kerekek ketenen nu me winak siup hiram tokim mau meit. Hirak kenip winak ik kakre iuwe, hirak kakre winak yaaik Mitik Iuwe Kraais kaku kakikrerek. <sup>22p</sup>Yi mit miyapir ne Kraais, te God kiriak yi mit en, yi yetike mit han nises him mirak, yi yapirwe yar ke winak ke God kewik keriuwe God Himin Yaaik.

### Menmen Pol kiriakem me mit ap ne weiwik me Isrel

**3** <sup>1q</sup>Hi Pol kerek hepu winak enuk ke gavman hentar hi hatip yi mit ap ne weiwik me Isrel him yaaim me Kraais, hi hitehi God ke yi mit miyapir. <sup>2r</sup>Hi han kitet yi epei yemtau God hanhana kehimitena hi

<sup>s</sup> 2:13 Kl 1:20 <sup>h</sup> 2:14 Ais 9:6; Kl 2:14; 1Ko 12:13 <sup>i</sup> 2:15 2Ko 5:17 <sup>j</sup> 2:16 Kl 1:20, 22  
<sup>k</sup> 2:17 Sek 9:10; Ais 57:19 <sup>l</sup> 2:18 Ef 3:12 <sup>m</sup> 2:19 Ef 3:6; Hi 12:22-23 <sup>n</sup> 2:20 Mt 16:18;  
 1Ko 3:11 <sup>o</sup> 2:21 Ef 4:15-16; Kl 2:19; 1Ko 3:16 <sup>p</sup> 2:22 1Pi 2:5 <sup>q</sup> 3:1 Ef 4:1; Fl 1:7, 13; Fm  
 1, 9 <sup>r</sup> 3:2 Kl 1:25

hiriak menmen mirak ekepi yi mit miyapir. <sup>3</sup>God kewepyapir menmen nipaa hirak kepakinem, hirak keteiknewem, te hi herteiyem. Nipaa hi hewisiyem mau tiwei. <sup>4</sup>Yi eikinaam, te yi eiyirtei hi hertei werek werek menmen me Krai nipaa God kisawinem meit. <sup>5</sup>Mit nipaa nepitariyem, te in ek God kewepyapirem keteikin haiu mit kerek hirak kehimitenai haiu profet metike aposel nirak hirak keteiknaiyem keriuwe God Himin Yaaik. <sup>6</sup>Him hirak kewepyapirem hiram im: Mit ap ne weiwik me Isrel, God kenipi hir netike mit ne weiwik me Isrel, hir yapirwe nanit menmen miutip, hir nire yink kiutip ke menmen God katip kakwetaiyem kakintar menmen Krai kerekyeyem.

<sup>7</sup>Me him yaaim im God kenipa hi mitik ke hi hatip mit han em. Hirak hanhana kekepa keriuwe menmen mirak manpenuk, te hi hiriak menmen hirak ketpewem. <sup>8</sup>God hanhana kehimitena hi kerek hi hikaru ke mit yapirwe nises God, hirak kehimitena hi hatip yi mit ap ne weiwik me mit ne Isrel hi hetpi him yaaim me Krai. Him yaaim me menmen yapirwe Krai kerekyeyem, mit hir ap nanirtei hir o as miram o iuwe miram marmeim te mamisi taau! <sup>9</sup>Hirak kehimitena hi akaap mit yapirwe hir nanirtei karkeik te God kakriak menmen nipaa hirak kepakinem. God nipaa kiriak menmen yapirwe kehanem nipaa enum eik ere in. <sup>10</sup>Hirak kehanem te in ek hirak kakteikin tipir, herwe, tekek maam, Seten o ensel nirak yaain neit wit kirak, hirak kakteinor hirak God hirekes kertei menmen yapirwe werek werek keriuwe menmen yaaim mit miyapir ne weiwik mirak hir niriakem. <sup>11</sup>God kiriak menmen im kises han kirak nipaa hirak han kitet kakriakem keriuwe menmen Mitik Iuwe kaiu Jisas Krai kiriakem me wi hirak kaa. <sup>12</sup>Haiu mises him me Krai Jisas, te haiu ap minaain God au. Haiu mertei haiu mamno mamitiwekhi me menmen, hirak ap te kakweikin sip kakwetai. <sup>13</sup>Hi etpi te yi ap han ekiperper eiyintar menmen enum man merewaank mentar hi ekaap yi mit au emit! Yi han yaaik eiyu eiyintar yi yayit niuk iuwe yeriuwe menmen merewaank me yi mit.

### Pol hanhan mit ne Efesas hir nanirtei Jisas Krai hanhani

<sup>14</sup>Hi han kitet menmen iuwe God kiriakem, te hi hinapipi hewen ninip hitehi God Haai menmen. <sup>15</sup>God hirak kewet mit ensel neit wit kirak o haiu mit meit ti kewetai niuk mirak. <sup>16</sup>Hi hitehi God te hirak kaksuiwe Himin Yaaik keriuwe menmen mirak iuwe manp enum hirak kakno kakikre han ki, te yi han tokik eiyu eiyit. <sup>17</sup>Te yi yises him me Krai werek werek, te hirak kaku kakit kakikre han ki. Hi hitehi God hirak han

<sup>s</sup> 3:3 Ef 1:9-10; Kl 1:26    <sup>t</sup> 3:6 Ef 2:13, 16-19    <sup>u</sup> 3:7 Kl 1:23, 25    <sup>v</sup> 3:8 1Ko 15:9-10; Ga 1:16; Ef 1:7    <sup>w</sup> 3:9 Ro 16:25; Kl 1:26    <sup>x</sup> 3:10 Ro 11:33; 1Pi 1:12    <sup>y</sup> 3:12 Jo 14:6; Ro 5:2; Hi 4:16    <sup>z</sup> 3:13 Kl 1:24    <sup>a</sup> 3:16 Kl 1:11    <sup>b</sup> 3:17 Jo 14:23; Kl 1:23, 2:7

tewenini te menmen mirak iuwe, hiram mamkepi yi hanhan eiriuwehan. Te yi eiyyu han tokik eiyyir ke nu nekenpi mekre ti metenen nu o teinik mitik kekre hei ketenen winak siup, te hirak tokik kerp. <sup>18</sup>Menmen im maamkaap yi mit miyapir yetike mit miyapir han ne God nerer wit wit, te yi eiyyirtei markeik te Kraiss hanhani. Hiram iuwe minin nepni, hiram mamno mamre nokim, hiram mamno kesiyen. Hirak hanhanai wisenum. <sup>19</sup>Hi hanhan yi eiyyirtei haiu mit ap te mamirtei werek werek marmeim te Jisas hanhanai. Hi hanhan menmen yaaim mau mekre God hiram mamnen yi mit, te yi han ki eku ekriuwerem.

<sup>20</sup>Hi hanhan hirak God kerek kiriak menmen iuwe kekre han kaiu minin menmen haiu mitiwekhiyem o han kitetim keriuwe menmen iuwe hirak kewisim mekre haiu mit. <sup>21</sup>Hi hanhan haiu mit miyapir yapirwe ne weiwik me God haiu emwenipi niuk mirak mentar menmen Jisas Kraiss kiriakem. Haiu emwenipi niuk mirak ere tipmain tipmain enum eik. Mepir keremem.

#### Haiu mit miyapir kerek mises him me God haiu mire yink ke Kraiss

**4** <sup>1</sup>Hi Pol kerek hepu winak enuk ke gavman hentar hi hiriak menmen me Mitik Iuwe Kraiss. Hi etpi him manp te yi eiyyises him me God werek werek kerek nipaa God kehimiteni yi eiyyisesim. <sup>2</sup>Yi ap eire iuwe au. Yi yemtau him me mit han yi eiyyisesim, yi yewenin han ki me menmen mit nerekiyiem, yi ap han enuk waswas me menmen ni yinan nerekiyiem au. <sup>3</sup>God Himin Yaaik kenip yi mit yi yau han kiutip te yi wen han ekikrit eiyyu han kiutip. Menmen im haiu miriakem hiram mar ke waai mesenkek menmen hiram menipai haiu mire niutip. <sup>4</sup>Haiu mit miyapir yapirwe haiu yink kiutip ke Kraiss, God Himin Yaaik kau kekrai. Hiram im em miutip mire menmen miutip yi wen yemeriyyem God kakwetiyyem yentar nipaa God kehimiteni yi yisesik. <sup>5</sup>Mitik Iuwe Kraiss kiutip kerekkep kepu. Haiu mit mises menmen mirak miutip. Wi nipaa mit nikrai neriuwe tipar hir nekine niuk miutip nektenai. <sup>6</sup>God kiutip kerekkep kepu, hirak Haai ke haiu mit, hirak kinin naanmiprai haiu mit yapirwe, hirak kiriak menmen ken nimin ke haiu mit, hirak kepu kekre haiu mit. <sup>7</sup>Kraiss epei kewetai menmen yaaim mamkaap haiu mit ne weiwik me God. God epei kewet haiu mit niutip niutip me menmen mirak yaaim iuwe. <sup>8</sup>Him me God nipaa mit newisim mau tiwei matip me menmen im. Hiram matip mar im: “Me wi Kraiss epei ken wit ke God, hirak keithis mit miyapir yapirwe kerek nipaa hir nau netike Seten hir nar ke mit enun nau winak enuk ke gavman.

<sup>c</sup> 3:18 Kl 2:2   <sup>d</sup> 3:19 Kl 2:10   <sup>e</sup> 3:20 Kl 1:29   <sup>f</sup> 4:1 Ef 3:1; Kl 1:10   <sup>g</sup> 4:2 Kl 3:12-13

<sup>h</sup> 4:3 Kl 3:14-15   <sup>i</sup> 4:4 Ro 12:5; Ef 2:16, 18   <sup>j</sup> 4:5 Jo 10:16   <sup>k</sup> 4:6 1Ko 12:6   <sup>l</sup> 4:7 Ro 12:3, 6   <sup>m</sup> 4:8 Sam 68:18; Kl 2:15

Krais ketorhis keriyei keru ken kewet haiu mit menmen yaaim mirak.”<sup>9</sup> Kenmak him matip: “Hirak ken wit ke God kau niu ein?” Hiram metpim mentar hirak kinin kinaaiwir wit kirak kekiuwe kan kau kekru nimin ke ti nimin ke wit kerek mit epei naa himin kir kewi.<sup>10</sup> Hirak kerek kekiuwe kan ti, hirak kerekek pike ken kau niu ein kinin nepni ken wit ke God, te hirak himin kirak kau kerer wit wit.<sup>11</sup> Hirak kerekek “kewet mit menmen mirak,” hirak kehimitan mit han hir nire aposel, hir natip mit menmen Krais kiriakem. Mit han hirak kehimiteni hir nire profet, hir newepyapir him me God. Mit han hirak kehimiteni hir nire evanselis, hir natip mit him me God nari han kir te hir enisesim. Mit han hirak kehimiteni hir nire pasto o tisa, hir naanempre mit miyapir hir nekepi hir nises him me God.<sup>12</sup> Krais kewet haiu mit menmen im, te hiram mamkaap haiu mit miyapir haiu mamriak menmen mirak te haiu mit ne weiwik me God, haiu mamre yink ke Krais, haiu mamre mit iuwe me menmen me God.<sup>13</sup> Menmen im mamno ere haiu mit mau han kiutip me menmen me God haiu misesim, haiu mau han kiutip me menmen haiu merteiyem me Krais, te haiu mamre mit iuwe yaain mamir ke Krais.<sup>14</sup> Haiu mar im, te haiu in ere maain ap mamre nikerek netari menmen. Haiu ap mises him enum me memitetpin. Mit nisesim hir nar ke kanu kenterer wan eik, hirak kiniu kewerek kepno in kepno ein. Mit kerek nises him enum me mit kerek hir nari han ke mit neriuwe him hir hiras han kitetim netpim.<sup>15</sup> Au, haiu hanhan hiras matip him yaaim me God emisesim, te haiu mepno ere haiu mire mit iuwe haiu mar ke Krais.<sup>16</sup> Krais hirak kire paan hirak kinin naanmipre haiu mit haiu mire yink kirak, te haiu miriak menmen mire hirak kehimitan haiu niutip niutip mamriakem. Haiu mit haiu mire his, hit nekeni, naan, te haiu mamkaapan, te haiu mamu yink kiutip. Haiu mamriak menmen mar im, te haiu mamre iuwe haiu han teweninan.

#### Mit nises God hir enweikin sip enwet menmen me nipaa

<sup>17a</sup>In ek hi hekrehir ke Mitik Iuwe Krais Jisas hi hetpi him manp. Yi in ere maain ap te yi eiyises menmen mit ap ne weiwik me God hir niriakem au emit. Hir han kitet menmen hiram enum weinim.<sup>18</sup> Han kir hirak kire mitik ke witaan ken ap ketenen si au. Hir niriak menmen enum nises menmen God kineinim nentar hir netari menmen me God, nekre han kir hir naineinim.<sup>19</sup> Te hir ap yink enuk au.

<sup>n</sup> 4:9 Jo 3:13    <sup>o</sup> 4:11 1Ko 12:28    <sup>p</sup> 4:12 2Ti 3:17    <sup>q</sup> 4:13 Kl 1:28    <sup>r</sup> 4:14 1Ko 14:20  
<sup>s</sup> 4:15 Ef 1:22, 5:23; Kl 1:18    <sup>t</sup> 4:16 Kl 2:19    <sup>u</sup> 4:17 1Pi 1:14; Ro 1:21    <sup>v</sup> 4:18 Ef 2:12  
<sup>w</sup> 4:19 Kl 3:5

Hir hanhan iuwe te hir nanises menmen enum me nariyanhis neweninem, han kir kekrit te hir niriak menmen enum enum nisesim wisenum.

<sup>20</sup>Yi mit miyapir ap yemtau haiu metpiyem yi yises him me Krais mar im taauye! <sup>21</sup>Hi hertei yi epei yemtau him me Krais, hir mit nan netpi him yaaim mirak. <sup>22</sup>\*Hir netpi him mar im: “Yi nipaa yi yises han ki enum. Hiram menmen enum me memitetpin, hemkre menepam me menmen, te hiram mewaank hiremes meriuwerem.” Hir mit natip menmen im yi eiweikin sip eiwetiwem einopin eikeipniwem. <sup>23</sup>Yi yiriak menmen im, te God eknip han ki hirak yaaik ekriuwe Himin kirak Yaaik. <sup>24</sup>\*God kiriak han ki hirak yaaik. Hirak kenip han ki kakir ke han kirak, te han ki ekises menmen yaaim ekriak God kaktike mit em.

<sup>25</sup>Te yi mit miyapir yapirwe niutip niutip einopin eikeipin menmen enum me memitetpin, eiwenin him menmen, eiyr ke mitik kenemtin laplap kerek hapik mewim kewirem men pin. Yi niutip niutip eitip him yaaim keremem eiriuwe ni yinan eiyrantar haiu mit yapirwe haiu niutip niutip pinan me yink kiutip ke Krais. <sup>26</sup>Wi yi han enuk eiriuwe menmen enum, yi naanempre hiras eiwenin han ki te yi ap eiriak menmen enum eiyrinterim. Yi ap han enuk han ekitet menmen im yapirwe au emit. Wi miutip kerek. <sup>27</sup>Te haiu ap emwis Seten kakri han kiau haiu mamriak enum. <sup>28</sup>Mit miyapir kerek nipaa ere in nekintip menmen hir pike nanriakem meiyam au emit! Hiram epei au! In ek hir enriak menmen yaaim enriuwe his mir, te hir nantenen menmen yapirwe te nanwet mit enun netenen menmen auri nankepi nanriuwerem. <sup>29</sup><sup>d</sup>Yi ap eitip him enum emike him ki au. Yi eitip him yaaim hiram mamkaap mit han hir nanimtau him mi, te hir enu werek werek. <sup>30</sup><sup>e</sup>Yi ap einip God Himin Yaaik han enuk ekriuwe menmen yi yiriakem kentar hirak kerek. <sup>31</sup>Yi eiweikin sip eiwet menmen enum me yi yine han enuk hekrit hekrit, yemtaantiwo, o yi yanuni yeriuwe menmen. Yi ap eitip yehiak yene mit, o yesiuwe him, te yi hanhan eiriak mit menmen enum eiriuwerem au emit. <sup>32</sup>Te yi eiriakan yaaim, han etweninan, yi eiyr sak menmen enum mit han nerekiyem, yi eitip hiram menmen weinim. Yi eiriakem eiyr ke God. Hirak kesak menmen enum haiu mit miriakem mentar menmen Krais kiriakem, te hirak katip hiram menmen weinim.

### Haiu mit miyapir emises menmen yaaim

**5** <sup>1</sup>God epei hanhani kesak menmen enum yi yiriakem, te yi eiyrisesik eiyr ke nikerek nirak hir nisesik. <sup>2</sup><sup>i</sup>Yi han etweninan eiyr ke

<sup>x</sup> 4:22 Ro 8:13; Kl 3:9    <sup>y</sup> 4:23 Ro 12:2    <sup>z</sup> 4:24 Jen 1:26; Kl 3:10    <sup>a</sup> 4:25 Kl 3:8-9; Sek 8:16  
<sup>b</sup> 4:26 Sam 4:4; Je 1:19-20    <sup>c</sup> 4:28 1Te 4:11    <sup>d</sup> 4:29 Ef 5:4; Kl 3:8, 4:6    <sup>e</sup> 4:30 Ais 63:10;  
 1Te 5:19; Ef 1:13-14    <sup>f</sup> 4:31 Kl 3:8    <sup>g</sup> 4:32 Mt 6:14, 18:22-35; Kl 3:12-13    <sup>h</sup> 5:1 Mt 5:48  
<sup>i</sup> 5:2 Ro 14:15; Ga 2:20; Hi 10:10; Eks 29:18



Krais nípaa han teweninai hirak kaa te kekepai. Hirak kaa, te menmen im hirak kiriakem hiram mire menmen mit newepwarem hiram minin yaaim mit newet God em.

<sup>3</sup>Yi mit miyapir ne God, te yi ap yimenipin yatipan me menmen enum me yisesan yiriran, o menmen enum me yink enuk o menmen me hemkre menepam au emit! <sup>4</sup>KYi ap eitipan me menmen enum menip mit yink enuk neriuwerem, o him weinim weinim, o him hir han enuk neriuwerem au emit. Yi eitipan eiwenipi niuk me God keremem. <sup>5</sup>Yi epei yertei werek werek menmen im. Mit kerek hir enun nariyanhis neweninem o mit enun nises menmen enum, o mit enun hemkre menepam neriuwe menmen hiram enum mar ke mit newepwar menmen newet tipir em. Yi yertei mit nar in en, hir ap te nanino nanu nantike God ketike Jisas Krai taau!

<sup>6</sup>Yi ap eiwis mit hir nanmitipin nanriuwe him weinim hir natip menmen im enum hi epei hetpiyem hiram yaaim au emit. Hir nemipin, te God kaknep mit kerek hir nises menmen enum hi epei hetpiyem. <sup>7</sup>Yi ap eiyses ei yir ke menmen enum hir niriakem ei yintar God kaknip. <sup>8</sup>Nípaa yi yar ke mit ne witaan yeke ti yen, te in ek yi kerek yi mit miyapir ne Mitik luwe Krai. Yi yar ke mit miyapir neke ti ne wepni (o yanm), te yi eiyses menmen yaaim keremem. <sup>9</sup>Menmen yaaim mit nisesim, hiram mire wepni (o yanm) kir, hiram meteikin mekam yaaim, mekam hiram mises him me God, mekam hiram him yaaim. <sup>10</sup>Yi han ekitet mekam yi eiysesim hiram mamriak Mitik luwe God han yaaik. <sup>11</sup>Yi ap eiyses menmen enum mire witaan toto mit enun niriakem. Au, yi eiwepyapir mit in em, yi ei yitpor menmen hir nisesim hiram enum. <sup>12</sup>Menmen enum mit niriakem nepakinem, hi yink enuk te hi ap etpiyem au emit! <sup>13</sup>Yi yewepyapir menmen yapirwe mit enun niriakem, hir nanirtei hiram yaaim o enum. Im em hiram mire wepni (o yanm) kir te mit nanir menmen. Yi yewepyapir menmen enum, hiram au mami. Im em hiram mire mitik kiman si kekere winak, menmen me toto hiram mami, si mir mepu keremem. <sup>14</sup>Mar keremem te him me God mau tiwei matip mar im:

“Ti mitik kerek ti haa hiwaai, ti pike ekrit, te Krai kaknen kaku han kit. Hirak kire wepni (o yanm) kir kenep ein ein.”

<sup>15</sup>Te yi naanempre hiras me menmen yi yiriakem. Yi ap eiriak menmen mire mit hir nepitari menmen. Au, yi eiriakem emir ke mit hir nertei menmen yapirwe. <sup>16</sup>Wi im hiram enum, mit hir niriak enum, te yi naanempre wi miutip miutip te yi eitip mit him yaaim me God te

<sup>j</sup> 5:3 Kl 3:5   <sup>k</sup> 5:4 Ef 4:29   <sup>l</sup> 5:5 1Ko 6:9-10; Kl 3:5   <sup>m</sup> 5:6 Kl 2:4, 8; Ro 1:18   <sup>n</sup> 5:8 Ef 2:11, 13; Kl 1:13; 1Pi 2:9; Jo 12:36   <sup>o</sup> 5:10 Ro 12:2   <sup>p</sup> 5:11 2Jo 10-11   <sup>q</sup> 5:13 Jo 3:20-21  
<sup>r</sup> 5:14 Ais 26:19, 60:1; Ro 13:11   <sup>s</sup> 5:16 Kl 4:5

mit nanirteiyek. <sup>17</sup>Te yi ap eiyises menmen enum au emit! Yi eiyises menmen Mitik Iuwe God hanhan yi eiyisesim.

<sup>18</sup>Yi ap eiyim tipar si enum te yi yetaritari eiriak menmen enum. Au, yi eiwis God Himin Yaaik eku ekikre han ki akinini naanmamri me menmen yi yairiakem. <sup>19</sup>Yi yetike ni yinan yi eitipan him me God, yi eiyine henye me God. Yi eiyine henye, yi eiwenipi niuk me Mitik Iuwe God eiriuwe him mi, yi eiriam tukin, wekinp, heurek, menmeiyam te yi han yaaik iuwe eiriuwerem. <sup>20</sup>Menmen yapirwe kerek mamnen, hekrit hekrit yi eiwenipi niuk me God Haai kiau mentar Mitik Iuwe kiau Jisas Krais kerek nipaa kekepai keriyei hiau men God.

### Pol katip him men mit miyapir hir neitan

<sup>21</sup>Yi eiyimtewan him me ni yinan yi eiyisesim eiyintar yi yises Krais, yi yewenipi niuk mirak.

<sup>22</sup>Yi miyapir yeit mikan ni, yi yemtau him me mikan ni yar ke yi yemtau him me Mitik Iuwe Krais. <sup>23</sup>Yi yiriak menmen im eiyintar mikan ni hir ninini naanempri nar ke Krais hirak kinin naanmipre mit miyapir hir nisesik. Hirak kaa, te pike kakithis hiau mit, hirak kire paan, hiau au hiau mire yink. <sup>24</sup>Yi miyapir yayimtau him me mikan ni yayisesim me menmen yapirwe yar ke hiau mit miyapir ne weiwik me God hiau memtau him me Krais hiau misesim.

<sup>25</sup>Yi mit epei yeit miyapir yi hanhani yar ke Krais hanhan hiau mit ne weiwik me God. Hirak kaa te kakikepai kaktaihis, <sup>26</sup>te hirak kenip hiau mit hiau yaain mentar hiau mises him mirak, te mit han nikirai neriuwe tipar. <sup>27</sup>Hirak kiriakem, te hirak kenip hiau mit ne weiwik miutip me God han kiau hirak yaaik iuwe kire mit ap wikes o warep mewi au. Hiau yaain mar ke mite yaaip wetpen enu, Krais kaktaihis. <sup>28</sup>Kar ke Krais hanhan hiau mit miyapir, te yi mit hanhan miyapir ni. Yi hanhani yar ke yi hanhan yink ki. Mit kerek hanhan miyapir nir hiram mar ke hir hanhan hiras. <sup>29</sup>Mitik kei kiutip ap kinaain yink kirak kakiwaankek au. Hirak naanmiprewek kakwetiwek menmen, te hirak kaku werek werek kar ke Krais naanmipre hiau mit ne weiwik me God. <sup>30</sup>Hirak naanmiprai hiau mit kentar hiau mire yink kirak. <sup>31</sup>Krais ketike hiau mit ne weiwik me God, hiau mau yink kiutip, mentar him me God mau tiwei matip mar im:

“Mitik keimin kakit mite, hirak kaknaaiwir miye haai, hirak kaktike mite pirak nanu niutip, hir nire yink kiutip.” <sup>32</sup>Him im yaaim,

<sup>1</sup> 5:17 Ro 12:2; Kl 1:9    <sup>2</sup> 5:18 Lu 21:34    <sup>3</sup> 5:19 Kl 3:16; Sam 33:2-3    <sup>4</sup> 5:20 Kl 3:17

<sup>5</sup> 5:21 1Pi 5:5    <sup>6</sup> 5:22 Jen 3:16; Kl 3:18; 1Pi 3:1    <sup>7</sup> 5:23 1Ko 11:3; Ef 1:22    <sup>8</sup> 5:25 Kl 3:19; 1Pi 3:7; Ga 1:4    <sup>9</sup> 5:26 Ta 3:5; Hi 10:10    <sup>10</sup> 5:27 2Ko 11:2; Kl 1:22    <sup>11</sup> 5:30 1Ko 6:15; Ef 1:22-23    <sup>12</sup> 5:31 Jen 2:24; Mt 19:5    <sup>13</sup> 5:32 Rev 19:7

hi han kitet hiram matip me Kraiss ketike haiu mit ne weiwik miutip me God. <sup>33</sup>Te hiram wen matip yi mit niutip niutip hanhan miyapir ni yar ke yi hanhan hiras. Miyapir yi eiwenipi niuk me mikan ni.

**Pol katip him me miye haai netike nikerek nir**

**6** <sup>1</sup>Yi nikerek yi eyimtau him me miye haai ni yentar God kehimiteni hir ninini naanmipri. Im em hiram yaaim. <sup>2</sup>Him me God mau tiwei matip mar im: “Yi eyimtau him me miye haai ni eyintar hiram keremem me him me God minin matip menmen yaaim God kakriak haiu mit em.” <sup>3</sup>Hiram matip mar im: “Yi eyisesim, yi eiyu werek werek eiyu ti tito yapirwe.”

<sup>4</sup>Yi miye haai, yi ap eine nikerek ni eyitpor enum enum yari han kir ere hir nine han enuk nemtaantiwo neriuwi au emit! Au, yi eineri eiteiknor menmen God hanhan yi yapirwe yi eiriakem.

**Pol katip him me mit hir niriak menmen me mit nir iuwe kerek ninini naanmipri**

<sup>5</sup>Yi wok mit kerek yi yiriak menmen me mit iuwe ni, yi eyises him me mit hir ninini naanmipri yeit ti ik. Yi naanempre hiras te yi yerekyor yaaim yar ke yi yiriak menmen me Kraiss. <sup>6</sup>Yi ap eiriak menmen yaaim te mit nantipare yi yaain keriyen au emit! Hekrit hekrit yi eiriak menmen eyir ke mit hir nises Kraiss enriakem, yi eyises menmen God hanhan yi eiriakem eiriuwe han ki. <sup>7</sup>Yi han yaaik eiriak menmen eyintar yi yiriak menmen me mit keriyen au. Yi yiriak menmen me God. <sup>8</sup>Yi yertei neimin hir wok mit hir niriak menmen me mit han, o neimin hir mit iuwe ninin naanmipre mit han, hir yapirwe nanriak yaaim, te hir nanit menmen mipiram me his me Mitik Iuwe Kraiss.

<sup>9</sup>Yi mit iuwe kerek yinin naanmipre mit weinin, yi eiriak menmen yaaim me mit ni. Yi ap eyitpor enum eineri, te hir enineini enisesi au emit! Mitik Iuwe Kraiss kepeit wit ke God, hirak kinini yetike mit ni naanmipri. Maain wi God hirak skelim mit, hirak ap han kitet ke mitik hirak iuwe o hirak weinik au. Hirak han kitet menmen mit niriakem mipiram.

**Mit nises him me God hir nar ke mit ne ami hir netike Seten nenapan**

<sup>10</sup>Hi etpi him im mikaru. Yi eiyu han tokik eyiriuwe menmen iuwe manpenum ke Mitik Iuwe Kraiss hirak keweteyem. <sup>11</sup>Yi eiwapin

<sup>g</sup> 6:1 Kl 3:20 <sup>h</sup> 6:2 Eks 20:12; Mt 15:4 <sup>i</sup> 6:4 Kl 3:21; Diu 6:7, 20-25; Sam 78:4; Pro 22:6

<sup>j</sup> 6:5 Kl 3:22-23; Ta 2:9-10; 1Pi 2:18 <sup>k</sup> 6:8 2Ko 5:10; Kl 3:24-25 <sup>l</sup> 6:9 Kl 4:1; Ro 2:11

<sup>m</sup> 6:10 1Ko 16:13 <sup>n</sup> 6:11 Ro 13:12; 2Ko 10:4; Ef 4:14

han ki eiriuwe menmen iuwe God keweteiyem, hiram mar ke nopen kiwapin yink ki, te yi han tokik eiyu eiriuwe menmen enum me memipin Seten kakri han ki kakriuerem. <sup>12</sup>°Haiu ap menepan metike mit au. Haiu menepan metike tipir enum mau nepni, Seten, tipir, herwe, teket maam, manmin o menmei ham hiram minin naanmipre menmen enum me ti. <sup>13</sup>Te yi eiyit menmen me God mamkepi hiram mar ke nopen, yipo henmik menmeiyam. Te maain wi enum mamnen yi eitike Seten yi einepan, yi yenepan epei au, yi wen eiyirp eiyu werek werek.

<sup>14</sup>°Yi eiyu eiyit menmen mamkepi. Yi eiriuwet him yaaim mamu mamkre han ki eiyir ke mit ne ami newis waai mau tu kir. Yi yiriak menmen yaaim hiram mar ke yi eiremink tanik mau han pank.

<sup>15</sup>°Yi eitip mit him yaaim me God hirak hanhan kaktike mit nankiyan nanu nanit, hiram mar ke yurik mit nemtin mau nopen hiram miwapin hit mi te mit hir nir hit mi newir yipo nanmip au hir nanimtenim. <sup>16</sup>Yi eiriak menmen im hi epei hetpim, yi wen han ekitet Jisas Krai eiyisesik, te hiram mar ke nopen hirak keseuni menmen enum tikaap, tinau, henmik o yipo te hiram mamiwep yi mit au. Yi han ekitetik eiyisesik. Menmen im mamkepi te Seten kakwir menmen enum mirak mire si mamnep han ki kariuerem au. Hiram mamtinpin mamno mami mamit. <sup>17</sup>°God keriuwet Jisas kaa, te kakithis haiu mit. Yi han ekitet menmen im, te hiram mamkepi mamre wa hesnu mit nemiu mau paan. Yi eiyises him me God hiram mamir ke hine me his God Himin Yaaik keweteiyem. <sup>18</sup>°God Himin Yaaik hirak kakikepi te hekrit hekrit yi eiyitehi God menmen, yi eiwenipi niuk mirak. Hekrit hekrit yi naanmamre hiras, yi ap eiyu yain yain au emit! Yi eiyitehi God kakikaap mit miyapir nirak. <sup>19</sup>°Yi eiyitehi God ke hi, te hirak kakweto him, hi ap yink enuk au, hi ehirp hatip mit him yaaim me Krai nipaa God kepakinem. <sup>20</sup>°Hi mitik hatip mit him yaaim. Te hi hepu winak enuk ke gavman henterim. Yi eiyitehi God kakikepa hi ap hinaain hatip mit him mirak au. Hi tewen ehitor menmen har ke nipaa hi hiriakem.

### Pol katip him mikaru

<sup>21</sup>°Tikikas, kaiu yinak yaaik kaknen kakitpi menmen yapirwe nepi man hi. Hirak mitik yaaik kiriak menmen me Mitik Iuwe Krai. <sup>22</sup>Hi heriuwetek kaknen yi mit kakitpi menmen, te yi eiyirtei haiu mepu werek werek, te yi han yaaik eiyu.

---

° **6:12** Jo 14:30; 1Pi 5:8-9    ° **6:14** Ais 11:5; 59:17; 1Te 5:8    ° **6:15** Ais 40:9; Nea 1:15; Ro 10:15    ° **6:17** 1Te 5:8; Ais 49:2; Hi 4:12    ° **6:18** Lu 18:1; Kl 4:2; 1Te 5:17    ° **6:19** Ap 4:29; Kl 4:3-4; 2Te 3:1    ° **6:20** 2Ko 5:20; Fm 9    ° **6:21** Ap 20:4; Kl 4:7-8; 2Ti 4:12

<sup>23</sup>Hi hanhan God Haai ketike Mitik Iuwe Jisas Krai hanhani tatrekyi yi eiyu werek werek yi eiyisesik. <sup>24</sup><sup>w</sup>Hi hanhan God kakriak menmen yaaim me mit miyapir yapirwe hir hanhan Mitik Iuwe kaiu Jisas Krai, hir nisesik nemtau him mirak werek werek.

**Mepir keremem**

---

<sup>w</sup> 6:24 1Pi 1:8